

NOVA DEMOKRATSKA STRANKA

P R O G R A M

NDS je politička stranka, osnovana sa ciljem stvaranja, oblikovanja i izražavanja političke volje svih građana, u svrhu ostvarivanja i zaštite njihovih osnovnih, Ustavom zagarantovanih prava, odnosno njihovih ljudskih, političkih, nacionalnih, ekonomskih, socijalnih, kulturnih i drugih prava i interesa. Ona djeluje na teritoriji Republike Kosova, s akcentom na Prizren, Peć, Mitrovicu, Leposavic i drugim mestima gde zive Bošnjaci. Deluje i u dijaspori sa ciljem otvaranja Bosnjackih centara radi očuvanja tradicionalnih vrednosti i sprečavanja asimilacije.

Ljudski potencijal:

NDS je stranka koja promovira i afirmira bošnjački kulturno-historijski identitet i tradiciju na Kosovu, a prihvata sve nacionalno-kulturne zajednice kosovskog društva, bez diskriminacije, predrasuda i stereotipa. Član/ica NDS može biti svaki punoljetni građanin Kosova i dijaspore, koji svoje težnje, ideje i politička stajališta može iskazati u stranci kroz statutom i programom utemeljenih prava, obaveza, dužnosti i odgovornost.

Vrijednosti partije:

NDS promovira i afirmira mir, ljudska prava i slobode, demokratska načela, toleranciju, pravdu, ravnopravnost, sigurnost, jedinstvo različitosti, inkluziju ranjivih kategorija stanovništva, integrativne procese, kooperativnost, dijalog i komunikaciju. Ove vrijednosti NDS kroz svoj rad primjenjuje za dobrobit bošnjačke i ostalih zajednica kosovskog društva i našeg naroda iz dijaspore, sa međunarodnim predstavnicima na Kosovu, i institucijama Kosova, Evrope i svijeta.

NDS se zalaže za čvrste kontakte i saradnju sa kosovskim institucijama i predstavnicima međunarodne zajednice u cilju postizanja socio-ekonomskog blagostanja bošnjačke i svih drugih zajednica u državi, što se ogleda u većem i bržem zapošljavanju, otvaranju novih radnih mjesta, te dobrom poslovnom ambijentu za biznis.

Nova Demokratska Stranka kao primarni cilj svog rada postavlja decentralizaciju u svim regionima u kojima je bošnjačka zajednica – većinska, pogotovu u prizrenskoj Župi gdje je, po posljednjem popisu, udio nevećinskih zajednica preko 90 % (Bošnjaka je u Župi – 86,1 %), ali i Vitimirici i Dragašu. Ovaj cilj NDS zasniva skladno evropskoj Povelji o lokalnoj samoupravi (Strazburg, 15.10.1985.) što podrazumijeva pravo i osposobljenost lokalnih vlasti da, u granicama zakona, reguliraju i rukovode znatnim dijelom javnih poslova, na osnovu vlastite odgovornosti i u interesu lokalnog stanovništva.

NDS se zalaže i za restrukturiranje velikih, glomaznih i birokratskih gradskih opština Kosova (Prizren, Priština, Peć, Leposavic, Mitrovica) na više manjih i učinkovitijih, građanstvu pristupačnijih opštinskih administracija.

Društveno-političko uređenje:

Republika Kosovo je, za NDS, nezavisna, suverena, jedinstvena i teritorijalno nedjeljiva država koja poštuje Ustavom zagantovana prava i slobode svim svojim građankama i građanima sukladno Univerzalnoj deklaraciji o ljudskim pravima UN-a (Pariz, 10.12.1948.), Evropskoj Konvenciji o zaštiti ljudskih prava i osnovnih sloboda (Rim, 4.11.1950.) i izmjenama u Protokolima 11 i 14 s Protokolima 1, 4, 6, 7, 12 i 13., zabrani diskriminacije prema Evropskoj Konvenciji o zaštiti ljudskih prava i osnovnih sloboda. Politički sistem Kosova temelji se na zakonodavnoj, izvršnoj i sudskoj vlasti koja poštuje i izvršava volju svih svojih građana kroz sistem parlamentarne demokratije, uz obavezno zapošljavanje pripadnika bošnjačke i drugih zajednica u državnim institucijama vlasti.

Evropske integracije:

NDS je evropska stranka koja baštini pravnu stečevinu Evropske unije (Acquis Communautaire) za cjelokupno dosad akumulirano pravo Evropske unije, odnosno skup pravnih normi i sudskih odluka koje obavezuju sve zemlje članice Evropske unije. Svaka država, pa i Kosovo, koja želi pristupiti Evropskoj uniji mora prihvatiti osnivačke ugovore i druge sadržaje izvedene iz ugovora i uskladiti svoje zakonodavstvo s pravnom stečevinom Evropske unije. NDS podržava kandidaturu za članstvo Kosova u EU uz procese integriranja i institucionalne, ekonomske i političke saradnje kako među susjednim zemljama tako i zemljama EU.

Privreda i društvo:

Program NDS promovira brz ekonomski i društveni napredak, te visok stepen zaposlenosti, postizanje uravnoteženog i održivog razvoja, slobodu kretanja robe, radnika i kapitala, tržišnu konkurenciju, izjednačavanje javnog i privatnog sektora, uvođenje javno-privatnog partnerstva, razvoj poljoprivrede i ruralni razvitak, zaštitu okoliša, sigurnost hrane, fitosanitarni nadzor, zaštitu potrošača, razvoj ribarstva, poduzetništvo, ujednačenu i skladnu industrijsku, energetska i saobraćajnu politiku, finansijski nadzor i budžetske odredbe, dobru monetarnu i poreznu politiku.

Pored temeljnih ljudskih prava, pravde, slobode i sigurnosti, NDS se zalaže za razvoj i primjenu informacionih tehnologija, osnivanje i finansiranje medija na bosanskom jeziku, poštovanje intelektualnog vlasništva, dobru socijalnu politiku i zapošljavanje, razvoj obrazovanja, nauke i istraživanja, tradicionalne i kulturne vrijednosti našeg naroda i bolju zdravstvenu zaštitu.